



LE GOUVERNEMENT
DU GRAND-DUCHÉ DE LUXEMBOURG
Ministère de l'Agriculture,
de l'Alimentation et de la Viticulture

**Gemeinsam Äntwert vun der Ministesch fir Landwirtschaft, Ernährung a Wäibau a vum Minister fir
Ëmwelt, Klima a Biodiversitéit op d'parlamentaresch Fro n° 515 vun den éierewäerten
Deputéierten Hären André Bauler a Luc Emering iwwert d'Asiatesche Runn a Varroamilbe**

1. Wéi vill Beievëlker sinn an de leschte fënnef Joer der "Varroamilbe" zum Affer gefall ?

D'Zuele vun de Verloschter vu Beievëlker iwwert déi lescht 5 Joer si folgend:

2023 -9%
2022 -12,7%
2021 -10,4%
2020 -8,4%
2019 -12,3%

Vu dass dës Verloschter multifaktoriell sinn, huet de Landwirtschaftsministère keng prezis Donnée vu Verloschter, déi duerch Varroamilbe verursaacht goufen. Zudeem ass d'Varroase an eise Beievëlker endemesch, d.h. ganz stäerk verbreet, an d'Varroase ass och keng meldeflichteg Krankheet. De Ministère ënnerstëtzt och finanziell d'Varroamëttelen, déi d'Imker an hire Beievëlker asetzen.

2. Ass déi "Asiatesch Horniss" mëttlerweil och zu Lëtzebuerg aktiv ?

Déi Asiatesch Runn ass hei am Land eng éischte Kéier am September 2020 zu Jonglënster festgestallt ginn. Am selwechte Joer sinn op méi Plazen (Esch-Uelzecht, Biekerech, Angelduerf...) zu Lëtzebuerg Individuen a Näschter entdeckt ginn, wat op eng méi flächendeckend Presenz vun dëser Aart hindeit. 2023 sinn 30 Näschter offiziell detektéiert ginn. D'Meldungen aus de leschte 4 Joer zu der Asiatescher Runn konzentréieren sech virun allem op de Süden an Zentrum vum Land, vereenzelt Virkomme sinn awer och aus dem Rescht vum Guttländ, der Muselgéigend, dem Mëllerdall an och aus dem Éislek reportéiert. D'Zuele weisen also, datt sech déi ursprénglech tropesch Aart och zu Lëtzebuerg etabléiert huet an en vue vum Klimawandel ass ze erwaarden datt sech hier Populatioun nach weider ausbreet.

3. Mat wat fir enge Mëttel kann et gelénge fir d'Beievëlker virun dësem aggressiven Insekt ze schützen?

D'Asiatesch Runn ass a Süd- an Zentraleuropa schon etabléiert a breet sech vun do och nach ëmmer weider aus. Hier Awanderung bei eis ass deemno net méi réckgäנגeg ze maachen an och kaum ze stoppen. Déi eenzeg reell Optioun ass dohier d'Aart an hiren Afloss op déi eenheemesch Biodiversitéit an notament d'Beievëlker am A ze behalen an e méiglechst gutt Zesummeliwe ze viséieren.

An deem Sënn gëtt aktuell probéiert, d'Zuele vun der Asiatescher Runn weiderhin op engem méiglechst nidderegen Niveau ze halen a gläichzäiteg d'Resilienz vun eisen Ekosystemer ze erhale respektiv ze stäerken, fir een natierlecht Gläichgewicht ze erreechen.

Hei ass och d'Ëffentlechkeet gefrot, déi weider sensibiliséiert soll ginn, fir Näschter (notament Primärnäschter am Fréijoer) déi entdeckt gi bei der Naturverwaltung ze mellen. Dës Näschter kënnen da geziilt ewechgemaach ginn fir ze evitéieren, datt sech grouss Kolonieentwéckele kënnen, awer och datt se hire Reproduktiounszyklus erfollegräich ofschléisse kënnen. Esou solle potenziell negativ Auswierkungen sou gutt et geet reduzéiert an déi weider Ausbreedung ofgebremst ginn.

Fir d'Hunnegbeie viru bestëmmte Falen ze schützen, kënnen d'Beienziichter Schutzdispositiffe an d'Entrée vun hire Beiestäck abauen, dozou zielen Agangsredukteuren, Zénk oder sougenannten "Maulkierf" fir Beiestäck.

Vun der Opstellung vu Falen (z.B. Fläsche mat Köder) gëtt iwwerdeems dréngend ofgeroden. Dës Method ass weder effikass fir d'Gesamtpopulatioun ze reduzéieren, nach selektiv, esou datt an deene Falen eng Onmass vun aneren nätzlechen an deels bedroten Insekten gefaang ginn.

4. Wéi gesäit an dësem Kontext d'Zesummenaarbecht tëscht de Beienziichter an dem Ministère aus ?

D'Naturverwaltung tauscht sech reegelméisseg mat der Fédération des Unions d'Apiculteurs du Grand-Duché de Luxembourg (FUAL) aus a war beim Komitee vun dësem Verband present.

Den Austausch concernéiert zum Beispill déi méiglechst fréi Detektioun a Meldung vun Näschter am Hibléck déi ze eliminéieren, mee och nei Pisten a Strategië fir eng besser Andämmung vun dëser invasiver exotescher Aart.

Lëtzebuerg, den 22. Abrëll 2024

D'Ministesch fir Landwirtschaft, Ernährung a Wäibau

(s.) Martine HANSEN